

摘藻堂四庫全書薈要

集部

欽定四庫全書薈要

集部

御選宋詩卷五十八

七



詳校官原任主事臣李斯咏

欽定四庫全書薈要卷一萬八千三百六十四

集部

御選宋詩卷五十七

五言長律一

趙普

雪中駕幸敝廬恭紀

貞元重數莢滕六劇霏葩漠漠初濡砌皚皚欲聚沙閭閻銀作界宮闕玉為家調鼎慙鹽撒沾溫覺絮加瑞凝三殿瓦欣動五雲車冰柱撐茅屋瓊枝擁翠華微行停

蹕警冷漏靜街譁具野曾無隗磻溪豈問牙公然門駐
輦那信室蟠蝸積素堪麟畫飛黃想兔置一庭看曳練
十道趣宣麻戎索籌先後雄材辨等差神威殷地軸御
指落天花袁卧甘朝穩裴功敢夜誇雪山行獻瑄早晚
到星槎

冠準

天安殿酌獻恭紀

聖運昭惟永高真協降祥方嚴泰壇祀先薦金山章典

禮官無曠消辰筮有常中天華闕秘象袞睟容壯霄迴
星河粲風微羽衛揚獻酬靈契接陟降寶儀彰顧諟欽
元命寅恭達上蒼彌文輝竹帛備物儼蕭薌尊道宸心
至登春雅俗康猶將泰齋潔禋福俟穰穰

奉和御製祀后土

臨晉迴清蹕靈壇備克禋薦誠祠后土求福為蒸民展
義王猷遠推恩慶賜均千官陪漢祀萬國奉虞巡仗衛
明初日郊原麗上春花飛函谷路柳暗九陽津宿麥深

藏雉柔桑遠映人河流
喧二陝山勢壯三秦
簫鼓聞雕上旌旗過渭濱
天聲傳廣野雲物動中宸
在鎬皇歡洽橫汾睿藻新
周南慙滯迹空想屬車塵

野步

幽景恣追尋遲遲傍柳陰
靜思非世務孤立是閑心
村迥遙峰出溪明返照侵
片沙招野步白鷺伴高吟
積雨迴塘漲微晴疊翠深
春鳩鳴古寺煙草入平林
迸笋行無定飛花勢不禁
凝然客亭上鄉思獨沈沈

縣齋春書十二韻

縣幽無俗事公退只高吟江到荆門闊山連蜀國深峽
雲長映日蠻雨易成霖羣雀鳴春院飢猿叫夜岑庭荒
多古木地僻見沙禽印鑠殘陽後人歸疊翠陰思鄉空
索寞素分信浮沈樂靜稀塵累甘閒負壯心衰容常嬾
櫛病髮豈勝簪寡欲慵求友防邪每自箴澆風終恥合
前事固難諶望斷天涯外離魂欲不禁

李維

王左丞新菊

青規前席暇歸沐興何長北第秋將晚東籬菊正芳幽
叢霏薄霧桂色豔輕霜已近黃金印兼臨白玉堂甘疑
掩萍實秀肯讓芝房有佞還應指無憂可要忘榮浮丞
相酒氣馥令君香好固松椿壽仙經識秘方

張詠

登宗陽縣美美亭

萬象盤迴處年來此創亭喧闐當邑地清絕倚禪局砌

迴波流碧窗涼洞壑青人家晴渡口漁釣暖沙汀岸竹
風成韻臯禽曉晒翎栽花多是樂題壁半書經遠客憑
消恨高僧與勒銘埽苔朝復暮閒日醉還醒不可窮吟
思將期列畫屏浮虛莫輕賞美美獨丁寧

晁迴

清風

仙馭來相慰解顏良會稀病蠲宜養素趣遠欲忘機懲
躁寧無漸延齡或可祈影搖珠箔細聲泛鈿箏微委恨

餘班扇流歡入楚衣陶潛知夢穩韓壽畏香飛氣爽蒼
龍闕涼生白虎闥健資難距筆偷撼獸鏤扉松下琴心
逸江東膾縷肥宿懷真隱處依約與同歸

王禹偁

宮漏出花遲

以下三首擬
試內制題

丹禁遲遲漏深宮灼灼花繁枝開正滿清韻出何賒靜
拂紅英密微穿翠葉斜依稀驚宿蜨冷落動晨鴉細逐
香離檻輕翻露滴沙願當直仙署鈴索共交加

春晚綠野秀

雨過川原上凝眸送晚春韶光銷欲盡野色望來新
天末逢藍嶂江湄亂麴塵垂楊難認影幽鷺莫藏身
遠接天開幕晴和草展茵明時四郊靜凌亂踏青人

東風解凍

習習氣初通
戕戕勢自融
淥波歸舊水
寒片漾和風
暖想千溪綻
吹疑一夜空
鷺翹休映白
魚躍乍翻紅
繒裂方塘上
瓊流巨壑中
漪連還浩渺
須賴濟川功

獻轉運副使太常李博士

邦計動宸衷時賢蒞浙東量寬吞渤海氣直稟崆峒

博士

燕人捧詔丹墀下辭班玉筍中饋糧蕭相國制禮叔孫通

舉措敦儒行談諧有古風冀方思舊政

博士前理冀人懷之

江

表佇成功吏畏嚴霜白民歌愛日紅勤王雖運智修道

豈妨工旋種煙莎徑間科雨竹叢養成丹頂鶴瘦盡雪

花驄移石情無倦抄書俸不充晨餐燒露笋秋白寫霜

楓碁閣連花塢書窗映燭籠僧傳栽樹法客獻遞詩筒

飲席螺為盞吟舟葦作蓬按琴苔院冷搗藥月堂空清
白成家計操修達聖聰即徵歸象闕清秩冠駕鴻

對雪有懷呈翟使君馮中允同年

歲暮山城雪民和歲有秋
渾聞五袴詠聊減貳車愁
凌亂藏谿寺霏微洒郡樓
凍宜黏酒旆香好試茶甌
逐吹殊無定連宵勢未休
仙娥低粉面熊耳壓峰頭
樹老花重發川長縞不收
平沈採芝洞深鑱避賢郵
麋鹿全迷徑鷹鷂不下鞬
夜村埋古屋

夜村在州東一村數百家皆姓夜

丹水咽

寒流上洛城中客梁園日下州前年直綸閣臘月奉宸
遊六出寒光亂重瞳喜氣浮催班臨秘殿稱賀拱凝旒
漠漠籠天仗輕輕落御溝瑤池同皎潔珠箔助颼颼民
有豐年望君無旰食憂佩垂延喜玉服曜吉光裘雞樹
令開宴鴛行許命儔千鍾方濫濫三爵未油油舉白朱
顏凝飛文彩筆抽傳宣須盡醉御札遣冥搜晚出蒼龍
闕驕馳紫鷺驄自慙生草澤人指在蓬丘薄命誠非據
清途不久留左遷來僻郡對景憶瀛洲謫宦誰還往貧

家自獻酬敢言無俸祿且喜潤田疇鳳閣名雖點貂冠
命亦優山中甘散秩膝下奉晨羞默默惟思過陶陶亦
自由搖頭詠詩什合眼入衾裯祇恨方於柄何嘗曲似
鉤詎能悲鵬鳥早合畏犧牛玉冷期三藝蘭香任一猶
夢中非蛺蝶世上本蜉蝣禍福如亡馬機關喻狎鷗甘
貧慕原憲齊物學莊周尚賴遷鶯侶傍依建隼侯願隨
商洛叟擊壤頌皇猷

商山十二韻

六百里巉巖嵐光霽後添經年吟未得

余到商州已經年方有此詩

盡日看無厭僧舍青當檻人家翠滿簷氣蒸丹水碧

丹水

在商州入漢

脉潤紫芝甜嶺礙翻雲鵲

商山鵲嶺最高

峰遮落海蟾

澗深春有凍影闊夏無炎勢鬪高并華名欺霍與滯石

危蹲虎脚松老宅龍髯曉榻便歌枕晴樓嬾下簾未能

棲岫幌猶道佐彤襜望久衣襟溼登多屐齒黏何當隨

四皓深隱避猜嫌

寄題洛陽秦供奉新樓

多羨新樓上公餘寫望閒數峯迷華嶽一面是商山檻
暗幽雲過簷喧宿鳥還萬重蒼翠裏百尺沈寥間嵐破
分樵徑沙明認釣灣望秦晴顚顚清洛夜潺潺平遠長
安道微茫函谷關吟哦生古意圖畫寄朝班何日隨高
步乘秋豁病顏銷憂吾祖事會待共躋攀

春遊南靜川

南過高車嶺

一云膏車嶺音告

川原似掌平峯巒開畫障畎畝

列棊枰帝女柔桑綠王孫野草生提壺催我醉戴勝勸

人耕商嶺堪攜妓丹河好濯纓蓋圓松影密鞭亂竹根
犇勃奮田氣磷磷水磴聲野桃誰是主山鳥不知名
欲舞寧無蜨思歌亦有鶯官閒春日永擔酒此中行

中條山

并序

薛許昌賦中條山十四韻且自云兩京之間巨題
不媿不負至今百年人亦無敢繼者禹偁量移解
梁日與山接苟默而無述後之覽吾集者謂宋無
人因賦二十韻而起河盡海之意不能不相涉也

蓋狀山之形張詩之氣使然耳又五老峯者茲山之特秀避而不言猶人無眉目矣過此皆許昌之所未道者以此易彼庶幾並行

崛起巨河邊犇騰欲上天遠臨滄海盡高與太行連大塊橫為脊他山立似拳土膏經舜耒石險任秦鞭洞黑狂吹雨峯青冷罩煙店荒檀道絕寺古柏梯懸崦漏微茫雪巖垂淅瀝泉迸根通砥柱斜徑入閒田北笑恒藏寶西輕華聳蓮三門遙託寄五老迴差肩落葉樵夫拾

靈苗本草傳柱空擎鴈塔倒影蓋漁船繪畫終無手封
宗必有年監池浮翠靄董澤媚漪連陰壑乖龍蟄枯杉
凍虺穿圖經標數郡神異產羣賢呼壽嵩何諂升中岱
豈專斯文如已矣此地可終焉暫看猶銷病頻登合得
仙許昌休自負吾什亦銘鐫

茶園十二韻

揚州作

勤勞修歲貢晚駕過郊原蔽芾餘千本青蔥共一園牙
新撐老葉

新牙之上去年舊葉尚在

土軟迸深根舌小侔黃雀毛獐

摘綠猿出蒸香更別入焙火微溫採近桐花節生無穀
雨痕緘滕防遠道進獻趨頭番待破華胥夢先經閭闔
門汲泉鳴玉甃開宴壓瑤樽茂育知天意甄收荷主恩
沃心同直諫苦口類嘉言未復金鑾召年年奉至尊

孫僅

勸書

儒家無外事招客勸青編筆墨東西置朱黃次第研頻
憂傷點竄細恐誤流傳改易文辭正增加字數全目因

繁處倦心向注中專端坐窮今古披襟見聖賢疲勞時
舉白遊息或談玄得興忘昏旭題名記歲年棲毫思確
解廢卷恨亡篇魚魯皆刊定誰人敢間然

楊億

到郡滿歲自遣

迢遞分符竹因循度歲華地將鯨海接路與鳳城賒

以時

就養乞外補知處州觸石雲頻起銜山日易斜潮平聚漁市木落

見人家吏隱偏知幸民謠豈敢誇無嫌勾漏僻且得養

丹砂

石硯

磊磊澗中石成形本一拳墨池遺號古筆陣用功偏

筆陣

圖以硯水為城池

得在燕臺側採從崑崙巔剖非藏趙璧鍊合

補媧天偶從他山上來參絳帳前光榮登玉案揮灑助
花牋注水蟾蜍滴題詩璫瑁筵如何班定遠發憤便輕
捐

夜讌

涼宵綺宴開醺醑湛芳壘鶴蓋留飛鳥珠喉怨落梅薄
雲齊鬢膩流雪楚腰迴巧笑傾城媚雕章刻燭催盤空
珠有淚鑪冷蕙成灰中角彈碁勝琴心促軫哀醉羅驚
夢枕愁黛怯妝臺風細傳疎漏猶歌起夜來

別墅

別墅過從數當年意氣豪象筵開旭日金絡騁平臯託
乘爭飛蓋銜杯更藉糟麝煙凝藻枕鱸縷落霜刀雞聳
花冠鬪猿驚柘彈號光風微轉蕙露井正開桃武子牛

探炙梁家鬼刻毛東城歸路晚飛絮撲雲袍

荷花

絕岸疎煙合回塘夕照和水仙猶度曲川后自收波銀
漢橋橫鵲銜臯襪濺羅玉杯承露重鈿扇起風多翠羽
芳洲近青絲快騎過石城秋信斷搔首奈愁何

秋夜對月

孤雲飛隴首灝氣滿區中驚鶴仙盤外圓蟾浴殿東浦
寒珠有淚巖迴桂生風星彩沉榆莢霜華襲桂叢光搖

銀燭亂影射玉壺空露館迷秦甸水臺接魏宮繞枝驚
暗鵲促杼思陰蟲更想離居恨迴腸幾處同

前檻十二韻

前檻瓊鈎挂深房斗帳褰梨花飛白雪蕙草吐青煙彩
鳳依珠樹神龍護玉蓮驚禽時格磔戲蜨自翩翾度繡
金針澀迷鈎畫蠟煎怨眉顰翠羽危涕迸朱絃遠信三
年字空庭尺五天行雲愁夢徹初日妬妝妍織為回文
亂鬟非墮馬偏風車來未定月杵望長懸寶鑑腸空斷

銀潢眼欲穿曾波自東注微意若為傳

樞密王左丞宅新菊

中樞多暇日小圃占秋光雕玉新成檻繁金乍泛觴陶
籬侵柳色羅宅掩蘭芳芝影連虛室萱叢接後堂傳巖
猶借雨庾嶺未飛霜溫樹偏分蔭芸籤亦鬪香交枝迷
露井墜葉點橫塘桐錄知延壽千齡奉紫皇

上巳玉津園賜宴

禊飲逢元巳春遊盛舞雩流杯傳楚俗飲賜出堯廚玉

樹天開苑銀潢水貫都肆筵環曲沼飛蓋塞交衢洛邑
聲詩逸蘭亭歲月徂顏王有遺韻待子一操觚

致齋太乙宮

漢帝祈年館威神法太微赤章修秘祝盤石拂仙衣雉
雊靈光發鸞歌彩霧霏霓旌飄夕吹瑤草泛春暉瓊屑
晨杯滿芝苗晝茹肥象尊猶一獻鳧舄自雙飛天迴颺
輪度宵殘素瑟希回看蔥鬱處佳氣接彤闥

螢

爽籟生遙圃斜暉落半岑微茫浮草際零亂起牆陰武
子窗塵積隋家苑樹深燈光透疎隙珠彩射清潯野燐
宵爭出星榆曉共沈長門秋漏水偏照淚涔涔

劉筠

荷花

暮雨過湘渚微涼滿楚宮
濺袞無限水障袂幾多風
浪跡嫌萍實塵勞笑菊叢
氣清防麝損信密待魚通
游女歌爭發騷人思未窮
休傳江北意月冷魏池空

秋夜對月

瑤席留歡友金波對廣庭重簾和霧卷六幕極天青屬
玉東西館琉璿左右屏梁園休賦雪隋苑漫飛螢蟾滴
全供硯牛津不見星綺窗分皎皎芸閣共亭亭已喪應
劉魄誰通鮑謝靈欲銷千里恨魯酒薄還醒

前檻十二韻

垂柳陰森院游絲曠蕩春蘅臯誰駐馬羅襪自生塵四
姓良家子三年賦客鄰折腰行太緩連瑣語何頻倭墮

雲爭媚便娟月鬪新滅瘢難辨玉約指不勝銀電笑投
壺勝江澄擣練勻東南勞鶴望西北限牛津寶唾凝蘭
氣鳴簧咽絳唇籠禽思隴樹洞犬謝秦人咏絮才無對
聞琴意始真長安足輕薄慎勿走瓊輪

上巳玉津園賜宴

需雲分渥澤裨飲恣歡遊綈幕侵晨設蘭泉對席流蕙
肴清蕙莆玉醴湛金甌春服萋萋盛光風濫濫浮桐華
濃竟發鶯語巧相求妙曲新聲合斜陽醉未休

致齋太一宮

紫館天神貴綸闡地望清齋心奉蠲潔攝事罄誠明殿
翼如軒翥壇垓類削成直官琳札密太宰繡衣輕辟荔
羅芳席虹蜺曳綵旌星陳五帝佐體薦一元牲蒼駟回
風馭珍禽警露聲丹霞升曉氣若木競新英挹袂寧無
友凌霄自放情受釐宣室對賈傳異諸生

螢

荒郊多腐草故苑近清秋棘密何勝數囊輕莫盡收月

高疑燭息天遠認星流紫桂風微急紅蘭露徧浮已能
穿永巷更欲拂高樓滅燭方無寐鳴蛩相薦愁

錢惟演

夜讌

昨夜讌南堂華燈燭九光削青爭落筆舉白鬪飛觴祇
覺輝裴玉寧思夢謝塘解煩多蜜勺藉俎半蘭芳促席
風絃怨開簾月露涼酡顏君莫訴西北轉銀潢

別墅

別館斗城傍斜軒映曲房蒼頭冠綠幘中婦織流黃複
道登平樂期門集未央意錢梁冀宅挾瑟莫愁堂走馬
章臺抑停車陌上桑穀弓隨寶幘投轄付銀牀出戴繁
星急歸衝細雨忙曾過阿君宿醉舞起跳梁

荷花

水閣雨瀟瀟風微影自搖徐娘羞半面楚女妬纖腰別
恨拋深浦遺香逐畫橈華燈連霧夕鈿合映霞朝淚有
鮫人見魂須宋玉招凌波終未渡疑待鵲為橋

樞密王左丞宅新菊

賀燕翻飛地靈芳茂遂時陰連桃李徑潤接鳳凰池夕
照揮金葆輕風拂翠蕤露珠清自泣煙素引還披西顙
霜雖勁南榮暖更滋擷芳多楚澤得地勝陶籬味可登
蘭籍香應奪桂旗願公長却老晏寢奉瓊卮

上巳玉津園賜宴

漢家傳洛飲楚俗泛蘭泉玉液初頒酒金盤屢擊鮮弭
彤尋竹籞傾蓋集芝廙錦羽翻晴旭霞英落暖煙雅音

和舜樂睿澤洽堯天更聽承雲曲同歌在鎬年

致齋太一宮

齋潔奉惟馨瑤臺獨自升樓迷五里霧壇燭九枝燈珠
館來青雀璇題射玉繩疎鐘平野闊古柏夕霏凝鶴扇
真規月仙衣可鏤冰春茶泛雲液曉飯薦蘭蒸鍊藥疑
洪井藏書類羽陵回瞻太帝室飛檻更長憑

薛映

清風十韻

爽氣乘秋至涼飈蕩暑初泠泠含遠籟戚戚動輕裾翠
幕波無際脩篁韻有餘潛驚塞草綠乍拂井桐疎素髮
悲郎將霜紉感婕妤窗光流熠燿簾影亂蟾蜍塵襲青
絲騎香飄紺幃車故宮經馭娑別館度儲胥薄暮來金
埒凌晨上玉除寧同起窮巷賸欲賦愁予

李宗諤

清風十韻

閒館方迴暑商飈乍應金天高初起籟松澹更宜琴汾

棹傳歌遠班詩託興深東陽仁自布西顥氣還侵太液
翻晴旭靈和亂翠陰舟輕飛燕袂臺迴楚王襟阮嘯經
時盡齊蟬度日吟愁生孤戍角響續暮城砧穴靜銷雲
縷庭虛轉蕙心賢哉吉甫頌千載有遺音

劉秉

清風十韻

何處來蘋末蕭騷盡四鄰金莖吹曉露玉宇動輕塵易
水離歌閨齊紈怨思新泛蘭迷舊澤落帽會佳辰籬菊

飄香遠庭桐墜葉頻帆開五湖客槎去九霄人曲沼鋪
紋簟平蕪偃綠茵鴻飛資羽翮鷹擊助精神仙馭歸堪
待琴松韻更真披襟同楚賦千古自相親

丁謂

荷花

相倚秋風立蘭言似有無未饒霜女俊不愛月娥孤力
弱煙披素心危露泣珠剪衣隨楚思幽怨寄吳歛半折
香囊解微傾醉弁扶涉江如可採百琲答輕軀

北苑焙新茶

北苑龍茶美甘鮮的是珍四方惟數此萬物更無新
纔吐微茫綠初沾少許春散尋紫樹徧急採上山頻宿葉
寒猶在芳芽冷未伸茅茨溪口焙籃籠雨中民長疾勾
萌拆開齊分兩勻帶煙蒸雀舌和露疊龍鱗作貢勝諸
道先嘗祇一人緘封瞻闕下郵傳渡江濱特旨留丹禁
殊恩賜近臣毀將靈藥助用與上尊親頭進英華盡初
烹氣味真細香勝却麝淺色過於筠顧渚慙投木宜都

媿積新年年號供御天產壯甌閩

石延年

海棠

君看海棠格羣花詎肯同嬌嬈情自富蕭散豔非窮舊
穀班吳苑梅羅碎蜀宮錦窠杯裏影繡段隙前烘心亂
香無數莖柔動滿叢意分巫峽雨腰細漢臺風盛若霞
藏日鮮於血灑空高低千點赤深淺半開紅妝指朱纔
布膏唇檀更融色焦無可壓體瘦不成豐枝重輕浮外

芭疎密闌中難勝蜂不定易入蜨能通

魏野

上知府冠相公

文武稟全才何人更可陪有官居鼎鼎無宅起樓臺聖
主詩方和親王狀始迴鎮臨來二陝調變輟三台鳳閣
須重去龍旌暫擁來下車三度雨上事數聲雷未暇瞻
珪壁先蒙訪草萊幾思趨相府恐懼復徘徊

燈花

宜假栽培力自然殊衆芳開非因雨露落不為風霜難
似殘鶯囀蛾如宿蝶狂丹心塵豈染明燄霧難藏墮睫
客看嬾畫眉人剪忙杏園遊宴者曾借我餘光

宋祁

余昔遊雲臺觀謁希夷先生陳搏祠緬想其人
今追作此詩

仙館三峰下年華百歲中夢休孤蝶往蛻在一蟬空藥
笈微言秘霄晨浩氣通丹遺舐後鼎林遣御餘風宿霧

沈荒白餘霞委暗紅峨眉有歸約飛步與誰同

集海雲鴻慶院

地勝祠仍古春餘物徧華山雲時抱石佛雨不萎花嶺
挾樓梯峻巖牽殿城斜淙溪雜環珮怪蔓走龍蛇供座
僧飛鉢香園客戲沙吾遊真草草深意屬青霞

十日宴江瀆亭

節去歡猶在賓來賞更延悠揚初短日淒緊乍寒天霽
沼元非漲秋花自少妍蟻留新獻耐蕙續不殘煙戲鯉

衝餘藻遊龜避折蓮流芳真可惜從此遂凋年

浣花泛舟

早夏清和在晴江沿渚時岸風搖鼓吹波日亂旌旗醉
帶牽綳蔓游鬟撲絳蕤樹來驚浦近山失悟舟移雅俗
西南盛歸輶東北馳此歡那復得拋恨寄天涯

韓琦

天章閣觀御飛白書五言十韻

內閣開清曉中天對邇臣唐虞遺典在河洛奧書陳二

聖勤勞舊千齡矩法新帝暉方咫尺宸翰復躬親鸞拂
宮綃舞花隨御筆春奎光連壁府劍影動龍津今古神
功絕頌宣上意均玉峰羅俎豆黼座拱星辰魚藻符亨
會蓬瀛寄此身流霞仙飲罷又賜一杯醇

聖恩勸酒惟
臣再賜巨杯

辛丑季秋大饗明堂中書宿齋

紫極宸居重黃扉禁戶深齋精嚴帝配祇翼答天心百
刻延壺箭千廬肅羽林秋聲來易感仙夢斷難尋小雨
隨雲散疎星伴月沈樹雞先曉唱菊酒帶香斟

重九
日

寂

爾潛神化脩然適道襟惟馨思在德盱蟹佇靈歆

范仲淹

寄題許州錢相公信美亭

華構高軒敞名湖一面分星辰居上相鼓吹燕中軍山
色來嵩室風光徹汝墳杉篁涵晚翠蘭蕙薦時薰坐嘯
頻乘月歸懷幾望雲迴臨黃霸俗遠味仲宣文萬戶方
開國三階復致君斯亭比棠樹千載頌清芬

依韻和延安龐龍圖柳湖

種柳穿湖後延安盛可游遠懷忘澤國真賞即瀛洲江
景來秦塞風情屬庾樓劉琨曾坐嘯王粲乍銷憂秀發
千絲墮光搖匹練柔雙雙翔乳燕兩兩睡馴鷗折翠贈
歸客濯清招隱流宴迴銀燭夜吟度玉關秋勝處千場
醉勞生萬事浮主公多雅政某與龍圖公同年
復為延安文政思共去
仙舟

獻百花洲圖上陳州晏相公

穰下勝游少此洲聊入詩百花爭窈窕一水自漣漪潔

白憐翹鷺優游羨戲龜闌干紅屈曲亭宇碧參差倒景

澄波底橫煙落照時月明魚競躍春靜柳閒垂萬竹排

霜仗千荷卷翠旗菊分潭上近

菊花潭在郡之西郊因有菊潭門復有菊潭鎮

近取菊植于洲中洲有高臺遂名之曰菊臺

梅比漢南遲

京洛而南至鄧始有梅比襄陽又晚

一岸鵲依人喜汀鷗不我疑綵絲穿石節

襄鄧舊俗正月二十二日

士女游河取小石通中者用綵線穿之帶以為祥

羅襪踏青期素髮頻來醉滄

浪減去思步隨芳草遠歌逐畫船移繪寫求真賞緘藏

獻已知相君那肯愛家有鳳凰池

和運使舍人觀潮

把酒問東溟潮從何代生寧非天吐納長逐月虧盈暴
怒中秋勢雄豪半夜聲堂堂雲陣合屹屹雪山行海面
雷霆聚江心瀑布橫巨防連地震羣檝望風迎踊若蛟
龍鬬奔如雨雹驚來知千古信迴見百川平破浪功難
敵驅山力可并伍胥神不滅憑此發威名

文彥博

清明日玉津園賜宴即席

節應桐華始筵開禁苑新推恩緣舊物加惠及陳人衆
樂聞天奏同寅會柄臣蘭肴享豐潔桂醕酌芳醇覆育
需雲廣涵濡湛露均桑榆垂晚景何路報堯仁

游東田八韻

文物平津閣風流太傅山勝遊松島外故迹樂園間霜
葩編為屋寒荆刈作闌牕櫺雲漠漠畦竇水潺潺蘆渚
炊煙起萍漚釣艇還竹經朝雨翠荷借夕陽殷幽興能
招隱高情自愛閒從來行樂處攜手一開顏

提舉端明見示三月晦日雨中書懷詩次韻

春光垂欲盡夏景漸增添鬱鬱松篁茂蕭蕭風雨兼
花心隨絮落屐齒被苔黏巧轉鶯遷木驚飛燕入簾
蝦鬚穿曲沼虎爪度前簷坐久香銷炷吟多筆費尖
雲容方靄靄日色未炎炎舞鶴傾丹頂遊龜散綠髯
命賓常務率出令更須嚴詩詠當階樂書尋傍架籤
蘭芬衣可襲露潤草俱沾貴近辭金馬編修賜玉蟾
高歡惟自適獨樂未嘗厭赤白曾諮丙丹青每誚閭
沖和緣養浩寂寞

為安恬身處貧無愧心貪道不廉成文推大手濟用鄙
輕縑視履循清節祈恩陋雜占聞韶欣鳳舞在藻愛魚
潛鱸膾思漁艇貂冠望酒帘聖時非吏隱賢業繫民瞻
撫事惟公論搗辭乃自謙保躬誠易退康世義難淹累
句慙無取酬言幸不嫌

田況

寒食開西園

春風寒食節夜雨晝晴天日氣薰花色韶光徧錦川臨

流飛鑿落倚榭立鞦韆檻外遊人滿林間飲帳鮮衆音
方雜遝餘景更留連座客無辭醉芳菲又一年

余靖

寄題田待制廣州西園

善政偏修舉增完池館清地含秋氣早月映暮潮生石
有羣星象花多外國名與民同雉免邀客醉蓬瀛翰墨
資吟興雲泉適野情鎮應持左蟹快欲鱸長鯨積霤藏
樓閣馴鷗識旆旌甘棠留美蔭高倚越王城

趙抃

初入荊江

迢遞辭宸闕，遷延換歲華。
舟纔入荊渚，人覺在天涯。
浪激多推岸，流濡足沸沙。
勢盤帆小，便漲淺路頻差。
橫艇又魚浦，搖旗賣酒家。
山微因念越，江窄正通巴。
煙色汀蕪淡，風光野燒斜。
蠻歌朝競唱，祠鼓暮連挝。
渡口初分柳，林邊未見花。
前程春始盛，一一待詩誇。

庭楠

彼美庭楠植基培幾十年夜來全庇月曉去薄生煙萬
葉光齊動雙株影共圓幽棲疑有鶴清響為留蟬飲對
傳三雅琴依按七絃河陽花自媚彭澤柳空眠勢翳門
闌靜幽侵几案鮮不才逢訟簡吟繞強成篇

遊青城山

三十六峯峻維岷在蜀竒方行刺史部重款丈人祠凍

雪諸蕃隔晴雲六面披訪山窮寶洞

山有寶仙第五洞昔投龍之所

敕

鬼覲豐碑泉落寒崖響蘿衣古木垂良工存舊筆

青城觀壁

悉孫知微名畫

老叟琢新詩陟險齊雙屐逢幽鼓七絲盤桓不

忍去還作更來期

張方平

大禮慶成

并引狀

皇帝陛下躬祀天地嚴配祖考百禮交舉而莫有違者萬靈來顧而莫不歆焉仍自發冊之朝以至肆赦之日風氣時順雲物晏溫大衆之都羣方畢會喜覲容典拊舞相慶非上聖陟降庭止其孰能

之於是乎臣等獲預近班親瞻盛事忭歎不足輒
撰成五言詩十韻宣曰揄揚休烈亦臣子愛戴之

誠

饗帝精禋舉嚴親廣孝純禰宮增謚惠皇冊薦威神寶
殿齋居肅琳房獻禮陳慨瞻清廟几穆莫紫壇茵備樂
嘉安曲鴻儀顯相臣玉從丹禁出

禮神之玉
出自禁中

輅儼繡旂

新

新造玉輅
今方御之

瑞靄蒙天仗祥風入帝宸歡呼九州會慶

澤萬方均有幸逢華旦無謨翼至仁但祈陪百禮景扈

越千春

九日侍宴太清樓

并引狀

今月九日蒙宣召赴後苑獲稻觀橙及太清樓射
弓侍宴惟時秋肅商旻日重陽琯春蕭辰之節物
綴宸賞於園游因宴示慈俾人同樂伏惟皇帝陛
下治猷時乂聖問日躋裁成太和丕覆羣品清籟
之田是獲稼作爾甘上林之芑素蕃天成其實駐
玉輿而省斂恣荷橐以榮觀而復頌以導守官之餘

輟於果丞之供並拜君賜交荷上仁方且坐寶構
之重深旅飛韃之雜襲雕弧在彀具相圃之和容
栗竒連飛餘西山之勁氣賚金咸暨醉露云晞浹
愜樂之洪私極亨嘉之盛遇臣等幸叨景從俯激
歡衷相趨舞歎之餘綴伎游揚之末冒陳清覽增
集覲顏謹齋沐各抒成九日侍宴太清樓詩一章
謹隨狀上進

登高聞舊俗況此奉堯觴鳴蹕遙空下層樓顙氣傍御

溝新過雨苑樹未經霜
楚澤丹芭重吳畦紫蕙香
三侯天縱妙九節召南章
中宜矜多藝威將攝四方
清時人共樂白日坐間長
近從叨慈渥區區祝壽昌

歐陽脩

被牒行縣因書所見呈寮友

周禮恤凶荒輶車出四方
土龍朝祀雨田火夜驅蝗
木落孤村迴原高百草黃
亂鴉鳴古堞寒雀聚空倉
桑野人行饁魚陂鳥下梁
晚煙茅店月初日棗林霜
瑾戶催

寒候叢祠禱歲穰不妨行覽物山水正蒼茫

初至夷陵答蘇子美見寄

三峽倚岩堯同遷地最遙物華雖可愛鄉思獨無聊
江水流青嶂猿聲在碧霄野篁抽夏笋叢橘長春條
未臘梅先發經霜葉不凋江雲愁蔽日山霧晦連朝
斫谷爭收漆梯林鬪摘椒巴賓船賈集蠻市酒旗招
時節同荆俗民風載楚謠俚歌成調笑祭鬼聚喧囂
得罪宜投裔包羞分折腰光陰催晏歲牢落慘驚飈
白髮新年出朱

顏異域銷縣樓朝見虎官舍夜聞鴉寄信無秋鴈思歸
望斗杓須知千里夢長繞洛川橋

送謝希深學士北使

漢使入幽燕風煙兩國間山河持節遠亭障出疆間征
馬聞笳躍雕弓向月彎禦寒低便面贈客解刀環鼓角
雲中壘牛羊雪外山穹廬鳴朔吹凍酒發朱顏寒草生
侵磧春榆綠滿關應須鴈北嚮方值使南還

奉使道中五言長韻

初旭瑞霞烘都門祖帳供親持使者節曉出大明宮城
闕青煙起樓臺白霧中繡鸛驕躍躍貂袖紫蒙蒙朔野
驚飈慘邊城畫角雄過橋分一水回首羨孤鴻地里山
川隔天文日月同兒童能走馬婦女亦腰弓度險行愁
失盤高路欲窮山深聞喚鹿林黑自生風松壑寒逾響
冰溪咽復通望平愁驛迴野曠覺天穹駿足來山北輕
禽出海東合圍飛走盡移帳水泉空講信鄰方睦尊賢
禮亦隆斫冰燒酒赤凍鱸縷霜紅白草經春在黃沙盡

日漾新年風漸變歸路雪初融祇事須彊力嗟予乃病
翁深慙漢蘇武歸國不論功

對雪長韻

對雪無佳句端居正杜門人間見初落風定不勝繁可
喜輕明質都無剪刻痕鋪平失池沼飄忽響窗軒惜不
搖嘉樹衝宜走畫轅寒欺白酒嫩暖愛紫貂溫遠靄銷
如洗愁雲晚更屯兒吟雛鳳語翁坐凍鷗蹲病思驚殘
歲朋歡賴酒尊稍晴春意動誰與探名園

羣玉殿賜宴

至治臻無事豐年樂有成圖書開秘府宴飫集羣英
論道皇墳奧貽謀寶訓明九重多暇豫八體極研精
筆力千鈞勁毫端萬象生飛牋金灑落拜賜玉鐙鳴
盛際崇儒學愚臣濫寵榮惟能同舞獸聞樂識和聲

東閣雨中

直閣時偷暇幽懷坐獨哦綠苔人跡少黃葉雨聲多
雲結愁陰重風傳禁漏過瑤圖新嗣聖玉塞久包戈
相府

文書簡豐年氣候和還將鳳池句聊雜野人歌

蘇舜欽

寒夜十六韻答子履見寄

風雨夜寒新空齋感慨頻詩書窮不放燈火靜相親
眺聽時懷土低摧動畏人

魏文詩云客子常畏人

漫書成咄咄遠吠

厭猜信念昔罹憂患惟君共苦辛漂流數千里會合十
餘旬各閔傷弓翼聊同煦沫鱗誰知公治罪衆笑伯龍
貧隔絕今一水睽離將再春嘉篇數為貺尺牘亦相珍

倚伏時難定屯亨理亦循
劍埋猶有氣蠖屈尚能伸
邦國方登俊江湖且放神
不憂知在命任重莫如身
白首襟期遠青雲志業均
陶然任元化慎勿損天真

梅堯臣

右丞李相公自洛移鎮河陽

侯服齊三輔天臺聳百僚
新章刻銅虎舊德冠金貂
已作歌襦化方期執玉朝
雙韉辭洛宅千騎向河橋
鼓角春城暮鶯花故苑遙
衣亭猶接畛棠茇自敷條
夾道都

人擁迎風駟牡驕莫隨文學乘空望旆旌飄

夏日晚晴登武昌西湖

新晴萬柳齊鶯度水東西城上明殘照雲間挂斷霓煙
蒲勻若翦沙岸淨無泥果壓繁枝重人乘小駟低嵐光
開翡翠湖色浸玻瓈只欠朱藤密如過罨畫谿

次韻和許發運真州東園新成

疏鑿近東城蕭森萬物榮
美花移舊本黃鳥發新聲
曲閣池傍起長橋柳外橫
河渾遠波漲雨急斷虹明
雲與

危臺接風當廣厦清朱髻看自躍翠柏種初生香草猶
能識山苗未得名南峯及西嶺常共酒杯平

御選宋詩卷五十七

欽定四庫全書薈要卷一萬八千三百六十五

集部

御選宋詩卷五十八

五言長律二

蔡襄

羣玉殿賜宴

有序

臣蒙恩宣召再至龍圖閣觀書羣玉殿曲宴伏以
數千年間無此盛事臣忝職翰墨榮遇非常謹賦
拙詩一首備載本末上干聖覽無任戰越之至

治道承炎歷皇基亘萬年深仁涵海嶽至德著坤乾文

物歸元首臣鄰必巨賢蓼蕭思及下奕葉力追先昕色

方羣進臚音忽四傳衣冠紛雜還臺殿鬱蟪蛄

嘉祐七年十二

月二十三日詔宰臣以下
龍圖天章閣觀三聖御書

寶字崇三聖瑤圖秘九天榮

河祥氣徹昭漢曉光旋磊砢珠璣在崢嶸歲月遷家聲

終卓越上意益恭虔書觀開鋪首

又辛寶文閣作飛白
字召臣寮觀人賜一

軸兼賜紙筆
墨各有差

宸毫落彩牋煙雲初不定鸞鳳互相鮮拜

賜兼金重珍藏尺璧全人人皆自得事事獨超前睿藻

敦風教

賜御詩一首令羣臣次韻和進

冥搜出化權來從玉山府遠過

柏梁篇迴馭臨高館

賜宴羣玉殿

推恩錫廣筵迷魂遊帝所

休應動星躔申命嚴樽俎

二十七日幸寶文閣召宰臣以下觀太宗游藝集瑞物十

三種仍賜御書宴羣玉殿宣諭太平無事令羣臣盡醉

新章被管絃千齡叨際會

曠古絕夤緣大施難論報精誠第祝延唯應歌盛美樂

石可磨鐫

陪尹子漸申安禮宿香山寺

二月已強半尋春登石樓山光侵雨變草色到雲休歸

鳥沈巖際行人過樹頭剝苔看石碣因火認漁舟漸夜
灘聲惡憑虛屋勢浮乘閒聊自適觴詠屬君流

登府店福昌山閣

危磴通高閣登臨境迴清雲開千岫出雪霽一川明斷
鴈來孤影遙泉落細聲野煙依竹見溪樹與橋平已助
騷人思空搖遠客情扁舟如可泛歷歷是江程

登三鄉寺閣

歷覽宜陽道披軒臨朔風地疑塵世外在畫圖中巖

曲疎鐘答村前小，約通水煙寒更白。
山氣曉微紅，遊宦直浮梗。流年似轉蓬，長懷無所寄。
盡日送歸鴻。

自漁梁驛至衢州大雪有懷

大雪迷空野，征人尚遠行。
乾坤初一色，晝夜忽通明。
有物皆遷白，無塵頓覺清。
只看流水在，却喜亂山平。
逐絮飄飄起，投花點點輕。
玉樓天上出，銀闕海中生。
舞極搖溶態，聞餘浙瀝聲。
客爐何暇煖，官酤未能醒。
薄吹消春凍，新暘破曉晴。
更登分界嶺，南望不勝情。

劉敞

聞韓范移軍涇原兼督關中四路

涇原非遠略韓范各名卿地盡三秦國身為百里城指
麾沙漠靜談笑鐵山輕報國心如日憂民病若醒終軍
材冠世汲黯直知名風雪隨車騎鷹鷂起旆旌年年戰
頻衄事事淚堪橫會刷蒼生恥重看鑄劍耕

駕幸飛山教場閱武侍宴

冬令三農畢時巡萬乘行川原分辟壘貔虎望麾旌王

氣雲成殿天光日繞營風隨鼓桴急塵絕馬蹄輕發石
機投短抨絃矢激明響振催列缺影墮落櫓槍令下凝
霜肅恩加挾纊平寨旗輕俯仰奪槊妙縱橫壯士前歌
勇儒生縱觀榮炙行烽燧舉觴溢海濤傾清道遙傳警
鳴鞭夕向城欲知威畧遠區外聳天聲

劉攽

和王正仲熙寧郊祀二十韻

駿命膺長發鴻圖本慎徽八方星拱極四海日升暉舊

典增咸秩彌文示表微聖時均玉燭天統正璿璣南極
迎陽復陰泉候氣歸積高常眷顧昭孝每無違羽衛來
雙闕和鑾並六飛風霆齊命令龍虎會旌旂帳殿層城
暮金波列宿稀嚴更虛夜鑿彫輦下彤闈廣樂千人唱
升煙萬目晞衆神知受記象物競來依陟降兼明察圓
方比範圍送音仍鶩鶩昇福想霏霏霈澤蘇羣動春陽
暢瑾扉慶深周揭厲感極至獻欵多士參鳴玉微生廁
皂衣肅雍瞻帝武奉引近天威儒館鵷鸞舊長謠錦繡

輝因知子雲賦何足頌巍巍

丁寶臣

和永叔新晴獨過東山

芳辰百五前選勝到林泉萬樹綠初染羣花紅未然陰
巖猶貯雪暖谷自生煙婦汲溪頭水人耕草際田日中
林影直風靜鳥聲圓健令多情甚尋春最占先

范師道

題隱圃贈蔣希魯

勇退人難事明公識慮長波濤濟舟楫霜雪見松篁林
下開前圃花間撒亞槍二疏良宴會老杜好篇章道向
清來勝機於靜處忘當除印如斗試一較閒忙

司馬光

賞花釣魚

日麗芙蓉闕春濃太液波苑門鳴玉集輦路翠華過芳
樹周阿密嘉魚在渚多浮英入尊竿頌首出蒲荷人樂
熙熙德臣賡旦旦歌萬生同鼓舞相與醉天和

雙竹詩

上苑通丹禁，修林繞玉堂。
周阿紆鏤檻，並幹擢新篁。
蕭灑駢瑤甃，連翩拂壁璫。
虬騰雙角直，鯨噴兩鬚長。
曉泊煙花重，晴留雨氣涼。
分音成律呂，齊秀待鸞凰。
碧借雲霞潤，清依日月光。
物情知有謂，天造固無方。
比節羣誠合，虛心至道彰。
吾君愈勤德，不敢有嘉祥。

和叔度獨登天臺水亭

郊外靈潭闊，新亭占曲隄。
戲魚迎墜絮，驚雉出荒蹊。
綠

倒楊梢亂光翻芰葉齊雨餘纖月偃野迴斷雲低水氣
常噴薄天風助慘悽何知塵外境近在郡樓西

和河陽王宣徽九日平嵩閣宴集

九日英僚集千秋勝賞同飛橋貫河渚危閣厭霜風金
散黃花泛雷驚疊鼓通百峰高鳥外萬里寸眸中檻底
臨丹葉杯中倒碧嵩來雲低拂座去鴈遠沈空吹帽陪
遊阻搖旌結想叢風流免堙滅鄒湛倚羊公

送張少卿學士知洪州

相府典型在朝閨望實高
紬書榮史觀典樂重卿曹
夷路迎飛輶桑林應奏刀
家簾傳舊學廟鼎刻前勞
絃服屯千騎連檣閱萬艘
劒芒衝夜氣閣影動秋濤
風色傳花信煙光拂酒膏
使君專問俗無意任遊遨

王珪

和吳相公從駕至開寶寺慶壽崇因閣

崇因開寶構金碧畫相輝
禁蹕隨曦馭層城轉斗機
梵音獅子吼妙相鵠王歸
洛水浮神篆天花散御衣
塔疑

從地湧簷擬入雲飛上行乘今果羣趨懼昨非慧珠常
自照法雨徧成霏但起真如念梯梁不可幾

王安石

擬和御製賞花釣魚

雲暖蓬萊日風酣太液春水光承步輦花氣入鈎陳伏
檻留清蹕傳觴屬從臣霏香連釣餌落葉亂游鱗飲
恩知厚衢尊賜願均更看追夏諺先和詠逢辰

韓絳

遊鴻慶院

久旱雨初足樂遊春正深
喧闐觀士女清曠入山林
佛界雲成寶僧園地布金
方塘探子石高閣盍朋簪
沙水通溪白松筠逐徑陰
紛華從滿目幽寂自虛心
印組端為累巖局得暫尋
晚風吹綠野歸騎已駸駸

韓縝

東山寺

久有東林約因乘暇日遊
眼明初出谷神旺欲凌秋
野

曠騫孤隼江清颺遠鷗近山青嶂合多稼綠雲浮雞犬
聲相接溝塍水亂流度橋喧從騎環樹獨鳴騶問俗驚
堯壤尋僧到沃洲深沈開寶闥磅礴杞華輶像設嚴珠
殿經聲隱絳幃仰看香刹直徐步畫廊修遇物皆周覽
逢軒即少留前庭初顯豁後徑轉深幽野嶺青筠麗霜
楓赤葉稠隔牆聞好鳥循沼玩遊鯈翠幹樓初剝紅芒
稻半收凌虛登陞道匝境對岑樓暗谷藏危棧平沙際
別州川原同聚沫身世劇浮漚回首飄鄉思臨尊浣客

愁清閒資善奕決勝在冥搜影動穰苴表風生曲逆籌
歸鞍不敢緩斜日照文楸

范純仁

謝師厚寄同黃壻魯直唱和

忽得穰郊信翛然病魄醒懷賢心獨在感舊涕偏零南
斗占神劒西豪聚德星卧龍看復起失馬顧曾經冰玉
清相照芝蘭遠更馨微官應念我白首候戎亭

祖無擇

暮秋江上逢端州朱使君詩以申餞

奕葉清芬遠夫君素履恢人皆推世德我亦愛卿材
新命一麾守長途萬里來畫船江雨暗紅旆海風開
服嶺先聲浹編氓美化該此行真邂逅幾日共沿洄
去矣瞻仙棹依然對酒杯前程如見憶為寄早春梅

題仰山二十韻

一作劉弇

維南斗牛下萬仞聳崔嵬日上光先占江盤勢却回
一方蒙雨露幾處對樓臺不逐秦鞭去曾經禹載來
雲生

峰慘澹氷泮谷喧阗險外煙嵐變深中洞府開巖花春
灼爍溪鳥暖毳毼飛瀑含清籟乖龍走疾雷平川蕭廟
闕半腹鄧壇摧精蘊瑤瑰寶竒鍾杞梓材僧軒宜薜荔
樵徑怯莓苔旁睨龍洲橘前瞻庾嶺梅仙經饒地肺賦
筆讓天台神物多靈貺農田少旱災隱君須獨行吟詠
亦難才何客能依止伊予語敢哉一麾成繫滯四友阻
遊陪未脫紅塵累徒嗟白髮催夢頻生枕席賞每到尊
罍預恐瓜時待圖歸作醉媒

途次金陵訪同年沈玉判官

數載天涯別年來不定居扁舟忽相值孤抱信何如公
幹猶多病孝先仍嬾書人生從坎壈客意且躊躇淡薄
市橋酒鮮肥江岸魚可來同飲食勿笑此蕭疎

程師孟

藥洲九曜石

何人移巨石終日壓寒泉不逐千秋改長如九曜連森
然禹州牧儼若舜官聯春浴多沂水宵占盛潁川舟疑

槎泛到橋訝鵲飛填暗向吹笳後明於秉燭邊風濤撼
莫轉霜霰蝕難穿可繼奇章嗜無由靖節眠廢興時自
異終羨爾長年

馮山

龍門洞

古洞嵌巖活青山氣象渾應龍常隱處流水不知源鬪
險雙峰秀凌虛古木尊怪籐寒覆坐修竹淨當門混沌
誰開鑿雲煙自吐吞深盤通海脉橫透露天痕日影循

崖腹泉聲遠石根江前塵不到物外景長存避地仙蹤
跡清人俗夢魂功名歸未得回看謝巖閣

鄧潤甫

道中詠懷奉寄利州允南使君

交印夔人國分襟汴水堤十年難會合一夢頓乖睽官
序潘生詘詩文庾信齊諸公多汲引憲府屢提攜不肯
乘驄馬那能出寶雞安恬輕世味洒落見天倪照物聰
明決為邦聞望躋笑譚清岸獄暇豫勸耕犁不忍為鉤

距何嘗設町畦燕堂傳夜燭遊轂碾春泥衆服題鸚鵡
疇將食駸駸草黃思隼擊梧碧值鸞棲欲問無來使開
編有舊題君方安玉壘予亦遠金閨地隔江波闊書傳
鳥翼稽豈知雙髻白相見兩當西內顧微他技殊私牧
遠黎辭親愁不斷叱馭意空迷吳苑飛雲杳春城北斗
低南山千里雪劒閣萬盤溪夜宿星邊驛朝行石上磯
深疑窺地軸高駭躡天梯看岫時欹帽聽泉或杖藜蕭
蕭黃葉下裊裊冷猿啼蜀道無艱險人心慢慘悽永懷

持後索遙想綴朝圭直北瞻天日征西疊鼓輦相期郡
齋冷清話看揮犀

沈邁

次韻和鞠顏叔游山

吏案方無事朋游出近山相從得所好終日有餘閒棄
置形骸外逍遙宇宙間谷風吹淅淅澗水濯潺潺灌木
開雲蔭餘花散錦斑輕輿留石步短棹下湖灣古寺羣
峰合孤洲萬竹環紫鱗驚躍起白羽倦飛還對酒忘塵

事臨流見病顏支離真可笑光景信難攀且共隕然醉

誰知是閉關

王仲淹云劉伶古之閉關人也

沈遼

和穎叔沖寂觀

疇昔學輕舉衰齡恨未逢殷勤尋福地邂逅聽仙鐘
堆阜規模古煙霞氣象濃
瀾湖開左派勾曲聳西峰
宮殿瞻黃皓風期想赤松
區中誠久壓物外或能容
落日窺三島陰雲隔九重
蛟淵無往害兔井識遺蹤
遐企旌陽

隱旁鄰山里封翹心冥有感稽首敢忘恭幽士期相訪
扁舟志未從拳拳望仙境尼父歎猶龍

次韻酬泰叔

志士有不遇由來多感傷末途長憫默往事委冥茫偃
蹇乾坤外推移日月長初心寄林壑何事襲軒裳才地
慙前輩文華笑老蒼討論聊自適仕進亦惟惶直欲馳
千里寧論出一鄉典謨窺禹契教化識軒唐不信時難
駕馬知命弗將士雖殊用舍吾豈托炎涼寶劍埋霜鏑

明珠稱夜光三公猶可去一命孰難忘壯節深無累高
歌詠更鏘振衣辭旦望逸跡寄朱張筦庫心何愧江湖
幸退藏朝辭汴師日夜渡淝河霜故國尋仙路當年結
客場二毛雖老醜一醉迺尋常花圃風生席雲齋月滿
牀清歌憐落落高論接琅琅誰謂羈遊地還陪君子觴
衆推朋好厚不間弟兄行斟酌南堂夜逍遙甬水陽長
篇荷高意他日結離腸

陳襄

題林和靖水亭

城外逋翁宅開亭野水寒
冷光浮荇葉靜影浸漁竿
吠犬時迎客飢禽忽上闌
疎籬僧舍近嘉樹鶴庭寬
拂砌煙絲裊侵窗筍戟攢
小橋橫落日幽徑轉層巒
好景吟何極清歡盡亦難
憐君留我意重疊取琴彈

蘇軾

是日自礪溪往陽平憩於麻田青峰寺之下院
翠麓亭

不到峰前寺空來渭上村此亭聊可喜修徑豈辭捫谷
映朱闌秀山含古木尊路窮驚石斷林缺見河奔馬困
嘶青草僧留薦晚飧我來秋日午旱久石牀溫安得雲
如蓋能令雨瀉盆共看山下稻涼葉晚翻翻

南溪有會景亭處衆亭之間無所見甚不稱其
名予欲遷之少西臨斷岸西嚮可以遠望而力
未暇特為製名曰招隱仍為詩以告來者庶幾
遷之

飛檐臨古道高榜勸遊人未即令公隱聊須濯路塵茅
茨分聚落煙火傍城闌林缺湖光漏窗明野意新居民
惟白帽過客漫朱輪山好留歸屐風回落醉巾他年誰
改築舊製不須因再到吾須老猶堪作坐賓

次韻張安道讀杜詩

大雅初微缺流風困暴豪張為詞客賦變作楚臣騷展
轉更崩壞紛綸閱俊髦地偏蕃怪產源失亂狂濤粉黛
迷真色魚蝦易豢牢誰知杜陵傑名與謫仙高埽地收

千軌爭標看兩艘詩人例窮苦天意竟奔逃塵暗人亡
鹿溟翻帝斬鼇艱危思李牧述作謝王褒失意各千里
哀鳴聞九臯騎鯨遁滄海捋虎得綈袍巨筆屠龍手微
官似馬曹迂疎無事業醉飽死遊遨簡牘儀刑在兒童
篆刻勞今誰主文字公合抱旌旄開卷遙相憶知音兩
不遭般斤思郢質鯤化類儵濠恨我無佳句時蒙致白
醪殷勤理黃菊未遣沒蓬蒿

宿餘杭法喜寺後綠野亭望吳興諸山懷孫莘

老學士

徙倚秋原上淒涼晚照中水流天不盡人遠思何窮問
謀知秦過看山識禹功稻涼初吠蛤柳老半書蟲荷背
風翻白蓮腮雨退紅追遊慰遲暮覓句儗兒童北望茗
溪轉遙憐震澤通烹魚得尺素好在紫髯翁

城南縣尉水亭得長字

兩尉鬱相望東南百步場插旗蒲柳市伐鼓水雲鄉已
作觀魚檻仍開射鴨堂全家依畫舫極目亂紅妝潏潏

波頭細疎疎雨脚長我來閒濯足谿漲欲浮牀澤國山
圍裏孤城水影傍欲知歸路處葦外記風檣

次韻子由送趙屺歸覲錢塘遂赴永嘉

歸舟轉河曲稍見楚山蒼候吏來迎客吳音已帶鄉言
從謝康樂先獻魯靈光已擊三千里何須四十強風流
半刺史清絕校書郎到郡詩成集尋谿水濺裳芒屨隨
採藥蠶紙記流觴海靜蛟鼉出山空草木長宦游無遠
近民事要更嘗願子傳家法他年請尚方

次韻和劉貢父登黃樓見寄并寄子由二首

清派連淮上黃樓冠海隅此詩尤偉麗夫子計魁梧

劉為

人短小

世俗輕瑚璉巾箱襲武夫坐令乘傳遽奔走為儲

須邂逅我已失登臨誰與俱貧貧倉氏粟身聽治家撫
會合難前定歸休試後圖腴田未可買窮鬼却須呼二

水何年到雙洪不受臚至今清夜夢飛轡策天吳

此詩寄劉

與子皆去國十年天一隅數竒逢惡歲計拙集枯梧好
士餘劉表窮交憶灌夫不矜持漢節猶喜攬桓須清句

金絲合高樓雪月俱吟哦出新意指畫想前撫自寫千
言賦新裁六幅圖傳看一坐聳勸著尺書呼莫使騷人
怨東游不到吳

此詩寄
子由

同王勝之游蔣山

到郡席不煖居民空惘然好山無十里遺恨恐他年欲
款南朝寺同登北郭船朱門收畫戟紺宇出青蓮夾路
蒼髯古迎人翠麓偏龍腰蟠故國鳥爪寄層巔竹杪飛
華屋松根泣細泉峰多巧障日江遠欲浮天略約橫秋

水浮屠插暮煙歸來踏人影雲細月娟娟

至真州再和二首

老手王摩詰窮交孟浩然論詩曾伴直話舊已忘年北
上難陪驥東行且趁船離亭花映肉醉眼鷺窺蓮施轉
三山沒風回五兩偏荒祠過瓜步古甃墮松巔聞道清
香閣新篴白玉泉莫教門掩夜坐待月流天小院檀槽
闌空庭樺燭煙公詩便堪唱為付小嬋娟

公顏如雪柏千載故依然笑我無根柳空中不待年肯

留歸闕旆坐待逆風船特許門傳籥那知箭起蓮相逢
月上後小語坐西偏流落千帆側追思百尺巔躬耕懷
谷口水石羨平泉茅屋歸元亮霓裳醉樂天行聞宣室
召歸近御爐煙未用歌池上隨宜教李娟

趙德麟餞飲湖上舟中對月

老守惜春意主人留客情官餘閒日月湖上好清明新
火發茶乳溫風散粥餠酒闌紅杏閣日落大隄平清夜
除燈坐孤舟劈岸撐逮君幘未墮對此月猶橫

郊祀慶成

帝出乘昌運天心予太平文章三代繼制作七年成大
祀乾坤合剛辰日月明泰壇朝埽地魄寶夜垂精仰御
圓蒼蓋環觀海岳城北流吞朔易西極落欂櫨升燎靈
光答迴鸞瑞霧迎需雲徧枯槁解雨達勾萌可頌非天
德因箴亦下情民言知可酌帝謂本無聲富國因崇儉
祈年在好生無心斯格物克已自消兵化國安新政孤
臣返舊耕還將清廟什留與野人賡

鬱孤臺

八境見圖畫鬱孤如舊游山為翠浪湧水作玉虹流日
麗崆峒曉風酣章貢秋丹青未變葉鱗甲欲生洲嵐氣
昏晨樹灘聲入市樓煙雲侵嶺路草木半炎州故國千
峰外高臺十日留他年三宿處準擬繫歸舟

鬱孤臺

再過虔州
和前韻

吾生如寄耳嶺外亦閒游贛石三百里寒江尺五流楚
山微有霰越瘴久無秋望斷橫雲嶠魂飛咤雪洲曉鐘

時出寺暮鼓各鳴樓歸路迷千嶂勞生閱百州不隨猿
鶴化甘作賈胡留祇有貂裘在猶堪買釣舟

用前韻再和霍大夫

文字先生飲江山清獻游典型傳父老尊俎繼風流度
嶺逢梅雨還家指麥秋自慙鴻鴈侶爭集稻梁洲野闊
橫雙練城堅聳百樓行看鳳尾詔却下虎頭州君意已
吳越我行無去留歸途應食粥乞米使君舟

用前韻再和許朝奉

高門元世舊客路晚追游清絕聞詩語疏通豈法流傳
家有衣鉢斷獄盡春秋邂逅陪車馬尋芳謝眺洲淒涼
望鄉國得句仲宣樓恨賦投湘水悲歌祀柳州何如五
字律相與一尊留更約登塵外歸時月滿舟

夷陵縣歐陽永叔至喜堂

夷陵雖小邑自古控荆吳形勢今無用英雄久已無誰
知有文伯遠謫自皇都人去年年改堂傾歲歲扶追思
猶咎呂感歎亦憐朱舊種孤楠老新霜一橘枯清篇留

峽洞醉墨寫邦圖故老問行客長官今白須著書多念
慮許國減歡娛寄語公知否還須數倒壺

白帝廟

朔風催入峽慘慘去何之共指蒼山路來朝白帝祠荒
城秋草滿古樹野藤垂浩蕩荆江遠淒涼蜀客悲遲回
問風俗涕泗閔興衰故國依然在遺民豈復知一方稱
警蹕萬乘擁旌旗遠畧初吞漢雄心豈在夔崎嶇來野
廟閔默愧常時破甑蒸山麥長歌唱竹枝邯鄲壯士

吳柱本經師失計雖無及圖王固已奇猶餘帝王號皎皎在門楣

游洞之日有亭吏乞詩既為留三絕句於洞之石壁明日至峽州三吏又至意若未足乃復以此授之

一徑繞山翠縈紆去似蛇忽驚溪水急爭看洞門呀滑磴攀秋蔓飛橋踏古查三扉迎北吹一穴向西斜歎息煙雲老追思歲月遐唐人昔未到古俗此為家洞暖無

風雪山深富鹿獬相逢衣盡草環坐髻應髻竈穴依巖
黑尊壘就石窪鴻荒無傳記想像在義媧此事今安有
遺蹤我獨嗟山翁勸留句彊為寫槎牙

蘇轍

次韻沈立少卿白鹿

白鹿何年養驚猜未肯馴軒除非本性飲食強依人照
影冰浮水飛毛雪灑塵獨遊應已倦忽見乍疑神野色
明幽步煙蕪薦卧身異姿人共愛清意爾誰親日暖山

苗熟風微澗草春何緣解韁繫奔放任天真

送蘇公佐修撰知梓州

乘軺舊西蜀出鎮復東川父老知遺愛壺漿定滿前江
山昔年路旄節異邦權望重朝中舊疆分劔外天歲登
無猛政蠻服罷防邊去國身雖樂憂時論獨堅孤城抱
松直彙進比茅連我亦相從逝疎狂且自全

和張安道讀杜集

用其韻

我公才不世晚歲道尤高與物都無著看書未覺勞微

言精老易奇韻喜莊騷杜叟詩篇在唐人氣力豪近時
無沈宋前輩蔑劉曹天驥精神穩層臺結構牢龍騰非
有跡鯨轉自生濤浩蕩來何極雍容去若遨壇高真命
將毳亂始知髦白也空無敵微之豈少褒論文開錦繡
賦命委蓬蒿初試中書日旋聞郿時逃妻孥隔豺虎關
輔暗旌旄入蜀營三徑浮江寄一艘投人慙下舍愛酒
類東臯漂泊終浮梗迂疎獨釣鰲誤身空有賦拚脛惜
無袍卷軸今何益零丁昔未遭相如原並世惠子謾臨

濠得失將誰怨憑公付濁醪

次韻劉貢父登黃樓懷子瞻

青山開四面白水繞三隅野闊時聞籟人閒舊據梧
畫船留上客遺迹問田夫事少日常飲才疎世未須
決河初薦至勝事偶相俱燕子卑無取滕王遠可撫
飛濤隱睥睨落日麗浮圖同舍新持節專城敢遽呼
未迎行部駕已放下淮艫試問登消暑何如楚與吳

吳興有消暑樓

再和

藹藹才名世駸駸日轉禺一時同接浙平昔共棲梧攬
轡真壯士擁旄良大夫塵埃脫緇綬水石慰霜須勝地
來相失清尊未暇俱射餘空見帖鑄罷祇觀撫歸計何
當決徂年貴早圖檻中終為食羈上恥聞呼顧我千羊
毳平生一釣艫微官不須滿也復試遊吳

放閘

畫舫連檣住清流汎閘平忽看銀漢落仍聽夏雷驚正
施遲回久開頭取次輕滯留初一快奔駛忽如傾不識

風濤恐聊同枕席行行逢賤魚稻飽食慰平生

次韻毛君山房遣興

欲就陽崖暖新開石磴斜誰言太守宅自是野人家燕
坐收心鑑冥觀閱界沙退公長寂寞外物自喧譁缺徑
移松補斜陽種竹遮白雲生後礎孤鶩伴殘霞破悶時
尋鶴呼眠亦任鴉喜聞糟出甕屢問菊開花古井原依
斗丹砂舊養芽蚍蜉頻上案猿狖巧分樵客到扁舟遠
年侵兩鬢華心搖挂風旆眼暗隔輕紗強撥橫肱睡來

從插版衙隱居慙棄擲勝地每咨嗟頑鈍終何取雕磨
豈復加焦先夙所尚園舍恰如蝸

孔武仲

五老峰

峻疊起青峰森然五老翁雲將色共古天與壽無窮突
兀巔嵯峭駢羅面勢雄三光同孕育四岳是兒童傑立
層霄際曾經壞劫中夢齡應可協圖寫獻堯宮

孔平仲

上巳飲於湖上

城南春已老湖上雨初晴草作忘憂綠風為解愠清楊
花輕欲下菱葉細方生酒影低雲木歌聲伴畫鶯賞心
殘藥在幽曲小舟橫却笑蘭亭會吟詩半不成

賀鑄

擬溫飛卿

露網朱甍上風簾翠鎖前宿衾熏菡萏朝鏡拂漪連津
潤銷金筆香依撲粉綿度閒雙陸子撥恨十三弦鸚鵡

殷勤語梅檀委曲煙鮫綃乾玉筋魚鑰限金蓮團扇
桃葉烏絲代杏牋朱門長窺窺白馬自翩翩難釣三珠
樹徒拋七寶鞭酒闌應有待夢破即無緣信鵲新秋去
孤蟾後夜圓浪言牆外地的是洞中仙

郎官湖

并引

按李白詩序云乾元歲流夜郎遇故人尚書郎張
謂使夏口沔州杜太守漢陽王令觴於江城之南
湖張公四望超然請白標之嘉名白因號之郎官

湖席上文士輔翼岑靖以為知言今所謂郎官湖者止郡城之北東於兩山間縱廣百許步固不足四望而超然也已知其非是且郡南瀕江之人持南唐時地券尚指郎官湖為鄰蓋湖為江水所并而去城里許猶有洲渚隱然未泯乃湖之故防也余丙子五月舟次沔陽求訪遺老始得其詳因賦此詩志之

當年賢守令載酒沔陽遊涼月呈新霽明湖涵素秋郎

官夏口使仙客夜郎囚促膝青螭舫連觴紫綺裘高驪
隨雨散餘矚想風流芳草失青履滄波浮白鷗江吞百
頃盡石刻一篇留宜有沈碑者前懷陵谷憂

郭祥正

和穎叔千歲棗

彼美祗園棗珍同玉井船後期千歲熟今日萬珠圓地
潤仍依佛闌深自冪煙結花雖最晚藏核莫如堅鴨脚
看何小雞頭美未全種來誰共老服久必成仙大食移

根遠番禺托帶連舊名稽藥錄新賞著詩編甜出諸錫
上香居百果前黑腰虛羨爾紅皺豈為然柔脆憐金鳳
飄零歎木綿諷包丹荔賦精奪寶刀篇靜夜風回海清
秋月蘸天綵山要客集翠顥繞枝駢邂逅為公壽婆娑
與世延暮鐘催酒散嘶馬引旗旋今作中州瑞原從異
國傳何當廣栽植欲以慰饑年

晁端友

登多景樓

樓上無窮景樓前正落暉開軒跨寥廓覽物極纖微雲
破孤峰出潮平兩槩飛東溟看月上西渡認僧歸木落
吳天遠江寒越舶稀魚龍鄰海窟雞犬隔淮圻草色迷
千古波聲蕩四圍廢興懷霸業融結想天機浩浩羣流
會沈沈百怪依登臨真偉觀回首重歔歔

沈遜

和同年祖擇之韻

一自曾經別於今歎索居善交思柳惠多病是相如官

下頻無況天涯每得書舊懷長惋歎此會合踟躕曉露
生蘭苑秋風動鱸魚蕭然林野性與世轉為疎

黃庭堅

東觀讀未見書

漢規羣玉府東觀近宸居詔許無雙士來觀未見書皇
文開萬卷家學陋三餘竹帛森延閣星辰繞直廬諸生
起孤賤天子自吹噓願以多聞力論思補帝裾

歲寒知松柏

羣陰凋品物松柏尚桓桓老去惟心在相依到歲寒霜
嚴御史府雨立大夫官犧象溝中斷徽絃爨下殘光陰
一鳥過斬伐萬牛難春日輝桃李蒼顏亦預觀

秦觀

擬郡學試東風解凍

寶歷開新歲春回斗柄東漪生天際水凍解日邊風浩
蕩依頻起侵尋帶雪融江河霜練淨池沼玉奩空魚藻
雍容裏雲霄俯仰中更無舟楫礙從此百川通

張耒

歲暮獨酌書事奉懷晁永寧

天涯催晚歲殘律去如奔入夜北風惡多陰寒月昏野
吹餘燒燼溪落舊沙痕霜重飢鷹疾田空宿雁喧山明
千筍直雲積萬營屯足雨耕犁早豐年柿栗繁地平秦
接席土斷洛開門白首三年客黃桑數畝村嬾梳悲髮
短不寐守爐溫折鶻披殘枿蒼龍卧老根晚篁猶竚思
幽藥助銷魂慷慨雙龍劒飄零一酒尊琳琅思秀色環

珮想清言獨語看明燭空庭月出軒

夜吟

簾捲涼侵戶窗虛月過帷高桐清露溼深柳夜蟬悲斷
續銀河轉欹斜斗柄移風來高葉報伏近候蟲知陶令
尊無酒潘生髻有絲將何慰愁寂倚杖獨題詩

八月三日舟行自蔡河赴臨淮

野曠天垂地川晴水見沙河回遠向背岸斷忽桑麻水
闊時浮鷺陂寒乍集鴉年饑田獲落歲晚客悲嗟新月

排雲去西風送日斜孤舟何處宿故國已天涯

離宛丘斗門

檣烏映高柳晚泊近晴川野日離煙樹風霜斷夕天牛
羊知別塹燈火認鄰船獨客歸何晚平蕪遠更連孤城
飛鳥外春水片帆前蕭瑟孤征恨更深獨未眠

用歐陽文忠韻雪詩

密雪當殘臘衝風到華門洒窗驚紙溼入竹覺聲繁天
闊飄無路城高積有痕氣和歸麥隴水味入茶軒廣陌

無游騎空郵有滯轅炎爐聊自暖濁酒僅能溫野迴征
鞍設邊寒塞甲屯振音歌歷歷回袖舞蹲蹲客坐須馳
褐相逢賴酒尊晴明占草木春意到閒園

陳師道

和黃充實石榴花

春去花隨盡紅榴煖欲然後時何所恨處獨不祈憐葉
葉自相偶重重久更鮮流珠沾暑雨改色淡朝煙著子
專寒酒移根擅化權愧非無價手刻畫竟難傳

同道士錢冷然尋澗水源

曉領黃冠子步尋東澗源
施筇探清淺垂手弄潺湲
岸閣殘花片槎留舊漲
痕鳳潛丹穴邃龍卧古潭
渾修竹青垂蔭長蘆翠可
捫忽驚穿藥圃不覺到雲
根磴外看飛鳥崖邊見飲
猿援琴寫山水布席坐蘭
蓀白石支碁局青沙藉酒
尊醉歌歸路穩洞口月黃
昏

蘇頌

次韻約諸君遊長干寺

寺按郡東南僧嘗為我談初因晉大士來獲古靈龕

時昔

有沙門惠達至金陵長干獲古佛塔因於其地建佛刹後代廢撤至天禧中僧惟政乞重建塔寺俱蒙賜額

歷世名空在重興德乃堪先朝賜新額此地建精藍億

載扶皇統生民息戰函刹仍存故里龍復止深潭九級

惟塗甃千梁盡架楠亭臺各軒豁巖谷更空豁殿角芝

成玉

殿柱嘗有芝草

松梢露墜甘穴棲多禮鼠池怪集神龜可

愛臨岡曲何人結草菴欲來尋隱逸誰與共歡酣念往

須勤到

來詩有念往曾高枕之句

登高已舊諳低頭小城市舉目徧

村嵐靜境由茲達塵容却自慙常思真趣嚮可抑俗饕
貪宇宙開懷適江山極望涵相邀幸多暇命駕即追參
謝太傅杜相公惠吳甘

任土吳邦果分甘故相庭纍纍朱實爛馥馥蜜筒馨玉
液三重釀神丹九煉形盤中堆火齊案上鬪銅釘玩比
韓嫣彈餐勝楚子萍瓊津融不竭塵慮滌還醒近鄙瓜
稱飽休誇李似瓶南樓今匪貴東望亦虛靈盛乃長洲
苑傳之大禹經秋包千樹富霜葉一林青薦味同飴露

淪輝信景星
租園輸稅賦
守吏占官丁
貢罷中都府
供先綠野局
緘封重篚襲
道里百郵亭
想憶金華宴
須傾縹甕醺
同梨資可口
與棗助延齡
豈意殊方物
頻沾俗吏廳
食珍時有媿
拜賜敢遑寧
顧乏齊瑤報
宜追戴帶銘
永言難紀美
應念思飄零

彭汝礪

合肥幕中有作

幕府開雄盛
朋遊望俊髦
雙松鬪冰雪
一鶚出蓬蒿
春

雨吟花蒂秋霜滿蟹螯山川留翰墨天地入風騷感慨
驚多變微生病一號酒卮餘寂淡詩筆惠英豪憂思生
心腑塵埃上髻毛簿書今日困道路此身勞細雨開濡
滯清飈散鬱陶小亭山可見從此欲登高

送劉器之待制知真定府

時平謀帥重侍從輟名卿龍種三千騎虬髯十萬兵紅
蓮王儉幕細柳亞夫營側道諸侯謁還鄉故老迎試詢
三將宅應過五梁城漫樂潭園勝難忘魏闕情守株嗟

我老杖鉞壯公行祇恐非朝夕君王召賈生

夜泊睦州桐江

一水連銀漢千山擁古城客乘清夜息舟倚碧溪橫皓
月危峰影清風細浪聲嘔啞殊俗語慘淡異鄉情途旅
淹時月羈窮獨弟兄剛腸雙古劒蕩迹一流萍道路人
皆厭風波我亦驚何為甘險阻所得喜豪英俗眼無相
笑吾非逐利名

潘大臨

春日書懷

舟楫凌漳水風濤接蠡湖
龍媒戒跬步驪頷脫微軀
樂土供遊戲深文苦繫拘
胸中雖磊砢牆外或歌呼
老去嵇康嬾歸來甯子愚
千鍾真臭腐十畝借膏腴
春雨何曾密園花竟自都
小橋藏細柳方沼出新蒲
酒熟拈巾漉經傳帶雨鋤
行盤隨所有坐客幾時無
日轉槐陰暮門通鳥徑迂
仰頭看哺鷁引手出將雛
撫事盆繅繭勞生戶轉樞
形骸浮大塊毛髮燎洪爐
世論幾膠柱人心


盡好竿屠龍非至計射雉屈良圖借箸方隆漢推枰已
滅吳從渠畫麟閣吾自著潛夫

御選宋詩卷五十八

謹案卷五十八第六頁前二行並幹擢新篁刊本

擢訛濯據傳家集改





總校官庶吉士臣侍朝

校對官檢討臣蕭九成

謄錄舉人臣李駟